

字於布上負而於市歌曰布乎布乎有告卓不悟三年四月帝疾愈卓入市布持矛刺卓兵士趣斬之 吳越春秋曰越王允常使民男女入山採葛作黃絲布獻之 吳王先賢行狀曰國中有盜牛者牛主得盜者曰我邂逅迷惑從今以後將改過子既已有幸無使王烈聞之人有以告烈者烈以布一端遺之曰是知耻惡知耻則善心將生故與勸為善也 典略曰蘇秦如趙逢其鄰子於易水之上從貸一疋布約償千金鄰子不與 廣志曰桐木其葉有白毳取其毳淹織緝以為布 聖證論曰梁與時布有垢則洗之於火 裴氏廣州記曰蠻夷不蠶採木繅為絮皮圓當竹剥古綠藤績以為布 燕書曰宋該字宣弘為右長史太祖會群僚以該性貪故賜布百餘疋令負而歸重不能勝乃至僵頓以愧辱之 俗說曰相豹奴善乘騎亦有極快馬有一諸葛即自云能走與馬等相車騎以百疋布置呼令豹奴乘馬諸葛競走先至者得布便俱走諸葛相與馬齊欲至垺頭去布三尺許諸葛一透坐布上遂得之 笑林曰沈珩弟峻字叔山有名譽而性儉老張温使蜀峻入內良久出語温曰向擇一端布欲以送

卿而無麤者温嘉其能顯非 晉殷臣奇布賦曰惟秦康二年安南將軍廣州牧騰侯作鎮南方余時承乏忝備下僚俄而大秦國奉獻琛來經于州衆寶既麗火布尤奇乃作賦曰伊荒服之外國逮大秦以為名仰皇風而悅化超重譯而來庭貢方物之綺麗亦受氣於妙靈美斯布之出類 票太陽之純精越常品乎意外獨詭異而特生森森豐林在海之洲煌煌烈火禁焉靡休天性固然滋殖是由牙萌炭中穎發燼隅葉因焰絮翹與炎敷焱榮華寶焚灼萼珠丹輝電近彤炳星流飛耀衝霄光赫天區惟造化之所陶理萬端而難察燎無燥而不焦在茲林而獨昵火焚木而弗枯木吐火而無竭同五行而並在與大椿其相率乃採乃拊是紡是績每以為布不盈數尺以為布帔服之無數既垢既汗以焚為濯投之朱鑪載燃載赫停而冷之皎潔凝白 啓 梁劉孝綽謝越布啓曰比納方縞既輕且麗珍邁龍水妙越鳥夷